



KEMENTERIAN PEMBANGUNAN
USAHAWAN DAN KOPERASI

SIARAN MEDIA

KUSKOP SOKONG PENUBUHAN PASUKAN PETUGAS TANGANI SALAH GUNA PAS LAWATAN SOSIAL (PLS) BAGI MELINDUNGI EKOSISTEM PMKS TEMPATAN

PUTRAJAYA, 13 FEBRUARI– Kementerian Pembangunan Usahawan dan Koperasi (KUSKOP) menzahirkan sokongan penuh terhadap pengumuman kerajaan baru-baru ini berhubung penubuhan pasukan petugas khas bagi menangani isu salah guna Pas Lawatan Sosial (PLS). Inisiatif yang diterajui oleh Kementerian Kewangan Malaysia (MOF) ini dilihat sebagai langkah proaktif dalam memastikan kestabilan ekonomi dan kedaulatan undang-undang negara.

Sebagai kementerian yang menggalas tanggungjawab membangun serta memudah cara kelangsungan ekosistem Perusahaan Mikro, Kecil dan Sederhana (PMKS), KUSKOP memandang serius pandangan para usahawan tempatan. Isu salah guna PLS oleh warga asing untuk menjalankan perniagaan secara tidak sah bukan sahaja menjejaskan ekosistem persaingan yang sihat, malah memberi kesan langsung kepada:

- **Produktiviti:** Mengganggu rantai bekalan dan pasaran tempatan yang sepatutnya diisi oleh pengusaha sah.
- **Daya Saing:** Mewujudkan persaingan tidak adil terhadap PMKS tempatan yang mematuhi peraturan dan membayar cukai.
- **Kelangsungan Perniagaan:** Menghakis margin keuntungan usahawan tempatan yang terpaksa bergelut dengan kos operasi yang semakin mencabar agar perniagaan mereka kekal bertahan bagi jangka masa panjang.

Sehubungan itu, bagi memastikan isu ini ditangani secara menyeluruh dari segenap sudut, KUSKOP menyatakan kesediaan untuk berganding tenaga dan menyelaraskan gerak kerja bersama Kementerian Pelaburan, Perdagangan dan Industri (MITI), Kementerian Dalam Negeri (KDN), Kementerian Perdagangan Dalam Negeri dan Kos Sara Hidup (KPDN) serta Kementerian Perumahan dan Kerajaan Tempatan (KPKT).

KUSKOP tidak akan sesekali berkompromi dengan mana-mana pihak yang terlibat dalam aktiviti menyalahi undang-undang yang mencabar kedaulatan negara. Fokus utama kementerian ini adalah untuk menyediakan persekitaran perniagaan yang adil, telus dan kondusif khusus bagi rakyat Malaysia.

Hebatkan Perniagaan Malaysia!

KEMENTERIAN PEMBANGUNAN USAHAWAN DAN KOPERASI
13 FEBRUARI 2026